

## He Whakatau

Me mātua pānui kia mārama rawa koe ki ngā whārangi 8–14 o tēnei pukapuka.



## He whakarāpopoto

Pānuihia te whakarāpopoto ki te ākonga. Kua whakarērea tētahi tama me tōna māmā e tōna pāpā. He aha ngā whanaungatanga hou? He aha ngā kare ā-roto o tēnā, o tēnā?

## He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatitina rawa te pūkenga tiro whakamua. Matapakihia ngā kupu hou, me mahi rawa te papa kupu me ngā whakaahua kei te uhi. Me whakamaumahara hoki te ākonga kia pātai ki a ia anō, i te wā e pānui ana ia mai i te fimatanga ki te mutunga o te pānui.

Matapakia ngā kare ā-roto tērā tonu pea ka rongohia e te tamaiti ina whakamōhiotia ia ka wehe atu tōna pāpā i tōna māmā. Titiro ki ngā kupu e tohu ana i te mamae, i te pāpōuri me te pōrarutanga (tae atu ki ērā kei roto i te papa kupu).

E ai ki te ākonga, he aha pea ngā huarahi ka whāia e te tama rāua ko tōna māmā ki te whakamārie, ki te tautokotoko tētahi i tētahi? He aha pea ētahi o ngā mahi, ngā kōrero hoki a tētahi ki tētahi?

## He Matapaki

### Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e mārama ana mā te whai i tētahi o ngā huarahi e whai ake nei;
  - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
  - te pātai mō tētahi āhuatanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
  - te whakatenatena i te ākonga mō tana tiro ki mua i whakaputa ai ia i te wā o te whakataki.

### Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini rīpene kōrero, i tōna kotahi rānei;

- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

## He whakapuaki māramatanga me ngā whakautu

1. Nā te aha i auahi ai te ao o Hāmuera?
2. I aha a Hāmuera rāua ko tōna māmā?
3. He aha ngā whanaungatanga hou i puta mai?
4. He aha ngā take i kī ai a Hāmuera i waimarie rāua ko tōna māmā?
5. Ki a koe nā, he aha ētahi o ngā take i kī ai a Hāmuera e kōroiroi ana ia?

1. Nā te kī a tōna pāpā kua wehe rāua ko te māmā o Hāmuera.
2. I nohopuku, i tangi hotuhotu, i awahi tētahi i tētahi.
3. He hoa rangatira hou mō te matua me tētahi māmā kē, teina hoki mō Hāmuera.
4. Ka rerekē ngā whakautu.
5. Ka rerekē ngā whakautu.

## He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuatanga o te pukapuka nei.

## Te pūtake

**T** He tuhi i ētahi kiānga me ētahi kupu e whakaatu kare ā-roto ana.

## He whakatakinga ā-roto, he whakaharatau

I mua i te pānui i te pukapuka, matapakia ngā kare ā-roto tērā tonu pea ka rongohia e te ākonga i tōna mōhiotanga ka wehe ōna mātua. He aha pea ngā kōrero i waenganui i te tama me te māmā mēnā kua wehe atu te pāpā? Kōrero mō ngā pānga hou ka tūpono mai pea.

Kia oti i te ākonga te pukapuka te pānui, matapakia ngā rerenga kōrero whakaputa kare ā-roto. Mā te kare ā-roto ka puta te auhatanga. He aha te take i whakawhenuhia ai pea te pōuri me te koa i roto i a ia? Tonoa te ākonga ki te whakaputa i ētahi kiānga, ētahi kupu rānei tērā pea ka whakaatu i aua kare ā-roto.